



**О‘ЗБЕКИСТОН RESPUBLIKASI SOG‘LIQNI SAQLASH VAZIRINING
BUYRUG‘I**

20²³ yil 30 avgust

213
№

Toshkent sh.

**Ўзбекистон Республикаси Президентининг “Оториноларингология
хизматини такомиллаштириш ва унинг кўламини кенгайтириш
чора-тадбирлари тўғрисида” 2023 йил 1 августдаги ПҚ-255-сон
қарори ижросини таъминлаш ҳақида**

Ўзбекистон Республикаси Президентининг “Оториноларингология
хизматини такомиллаштириш ва унинг кўламини кенгайтириш
чора-тадбирлари тўғрисида” 2023 йил 1 августдаги ПҚ-255-сон қарори
ижросини таъминлаш мақсадида буюраман:

1. Ўзбекистон Республикаси Президентининг “Оториноларингология
хизматини такомиллаштириш ва унинг кўламини кенгайтириш
чора-тадбирлари тўғрисида” 2023 йил 1 августдаги ПҚ-255-сон қарорига
мувофиқ 2023 йил 1 сентябрдан бошлаб юридик шахс мақомига эга бўлган
Республика ихтисослаштирилган оториноларингология ва бош-бўйин
касалликлари илмий-амалий тиббиёт марказини ташкил қилинганлиги
маълумот ва ижро учун қабул қилинсин.

2. Қуйидагилар:

Республика ихтисослаштирилган оториноларингология ва бош-бўйин
касалликлари илмий-амалий тиббиёт марказининг тузилмаси 1-иловага
мувофиқ;

Республика ихтисослаштирилган оториноларингология ва бош-бўйин
касалликлари илмий-амалий тиббиёт марказининг (кейинги ўринларда -
Марказ) устави 2-иловага мувофиқ тасдиқлансин.

3. Ихтисослашган марказлар фаолиятини мувофиқлаштириш
бошқармаси (З.Сайфутдинов) бир ҳафта муддатда Марказ уставининг давлат
рўйхатидан ўтказилишини таъминласин.


4. Мазкур буйруkning ижросини назорат қилиш вазир ўринбосари
У.Сабилов зиммасига юклансин.

Вазир



А.Иноят

Республика ихтисослаштирилган оториноларингология ва бош-бўйин касалликлари илмий-амалий тиббий маркази ТУЗИЛМАСИ



Соғлиқни сақлаш вазирининг
2023 йил “30” 08 даги
“213”-сонли буйруғига
2-илова

**Республика ихтисослаштирилган оториноларингология ва бош-бўйин
касалликлари илмий-амалий тиббиёт марказининг**

УСТАВИ

1-боб. Умумий қоидалар

1. Ушбу Устав Республика ихтисослаштирилган оториноларингология ва бош-бўйин касалликлари илмий-амалий тиббиёт марказининг (кейинги ўринларда Марказ деб аталади) фаолиятини ташкил этиш ва молиялаштириш тартибини белгилайди.

2. Марказ ўз фаолияти йўналиши бўйича даволаш-профилактика ва илмий-услубий фаолият олиб борувчи ҳамда аҳолига юқори малакали ихтисослаштирилган тиббий ёрдам кўрсатувчи мустақил давлат тиббиёт муассасаси сифатида ташкил этилади ва республика оториноларингология тизимининг бош муассасаси ҳисобланади.

3. Марказ давлат муассасаси шаклидаги юридик шахс ҳисобланади, ўз мустақил балансига эга, белгиланган тартибда Ўзбекистон Республикаси ҳудудидаги банкларда ҳисоб-китоб рақамлари ва валюта ҳисоб рақамларини, шахсий ғазна ҳисоб рақамларини очади, Ўзбекистон Республикаси Давлат герби туширилган ва Марказнинг тўлиқ номи ёзилган муҳрга, штампларга ва бланкаларга эга.

4. Марказ юқори малакали ихтисослаштирилган тиббий ёрдам кўрсатади, шунингдек мутахассислик турлари бўйича тиббиёт кадрларини тайёрлаш, қайта тайёрлаш ва уларнинг малакасини ошириш бўйича клиник ҳамда ўқув базаси ҳисобланади.

5. Марказ ўз фаолиятида Ўзбекистон Республикаси Конституцияси ва қонунларига, Ўзбекистон Республикаси Олий Мажлиси палаталари қарорларига, Ўзбекистон Республикаси Президенти фармонлари, қарорлари ва фармойишларига, Ўзбекистон Республикаси Вазирлар Маҳкамаси қарорлари ва фармойишларига, Ўзбекистон Республикаси соғлиқни сақлаш вазири буйруқларига, ушбу уставга ва бошқа қонунчилик ҳужжатларига амал қилади.

6. Марказнинг тўлиқ ва қисқартирилган номи:

а) давлат тилида – **“Respublika ixtisoslashtirilgan otorinolaringologiya va bosh-bo‘yin kasalliklari ilmiy-amaliy tibbiyot markazi” davlat muassasasi;**

қисқартирилган номи – **“RIOvaBBKIATM” DM;**

б) рус тилида – **Государственное учреждение “Республиканский специализированный научно-практический медицинский центр оториноларингологии и болезней головы - шеи”;**

қисқартирилган номи – **ГУ “РСНПМЦОиБГШ”;**

в) инглиз тилида – **State Institution “Republican Specialized Scientific-Practical Medical Center of Otorhinolaryngology and Head and Neck Diseases”**;

қисқартирилган номи – **SI “RSSPMCМН”**.

6. Марказнинг почта манзили: Тошкент шаҳар, Яшнобод тумани, Махтумқули кўчаси, 103-уй.

7. Марказнинг муассиси Ўзбекистон Республикаси Соғлиқни сақлаш вазирлиги ҳисобланади ва Марказ Ўзбекистон Республикаси Соғлиқни сақлаш вазирлигига бўйсунди.

2-боб. Марказнинг асосий мақсадлари, вазифалари ва функциялари

8. Қуйидагилар Марказни ташкил этиш ва унинг фаолияти мақсадлари ҳисобланади:

юқори малакали ва юқори сифатли ҳамда ҳозирги замон халқаро талабларига мос келадиган ихтисослаштирилган тиббий ёрдам кўрсатишга мўлжалланган юқори технологик моддий ва илмий базани, шунингдек, ушбу йўналишдаги мактабни шакллантириш;

ўз ихтисослиги бўйича касалликларга ташхис қўйиш, уларни даволаш ва касалликларнинг олдини олишда аҳолининг юқори малакали ихтисослаштирилган тиббий ёрдамга бўлган талабини қондириш.

9. Қуйидагилар Марказнинг асосий вазифалари ҳисобланади:

а) қуйидаги аҳолига ўз ихтисослиги бўйича юқори малакали ихтисослаштирилган тиббий ёрдам кўрсатиш:

рўйхати қонунчилик ҳужжатлари асосида аниқланадиган имтиёзли тоифага кирувчи шахсларга бепул асосда;

Ўзбекистон Республикаси фуқароларига (бундан ушбу кичик банднинг иккинчи хатбошида кўрсатилган шахслар мустасно), шунингдек, чет эллик фуқароларга ва фуқаролиги бўлмаган шахсларга пулли асосда;

б) мавжуд тиббиёт техникалари паркининг доимий равишда янгиланиб борилишини ва модернизация қилинишини таъминлаш, Марказни ўз ихтисослиги бўйича ҳозирги замон халқаро талабларига мос келадиган юқори малакали ихтисослаштирилган тиббий ёрдам кўрсатиш имконини берадиган замонавий тиббиёт асбоб-ускуналари билан жиҳозлаш;

в) Марказ фаолиятини таъминлаш учун молиявий ва моддий техник ресурсларни жалб қилиш бўйича менежмент ҳамда маркетинг ишларини ташкил этиш;

г) Марказ тиббиёт ходимларининг касбий даражасини, шу жумладан мутахассисларнинг хорижий етакчи тиббиёт (таълими) муассасаларида ва клиникаларида ўз ихтисослиги бўйича касалликларга ташхис қўйиш ва уларни даволашнинг замонавий усуллари бўйича стажировкаларини ташкил этиш ҳисобига доимий тарзда ошириб бориш ва такомиллаштириш;

д) ўз ихтисослиги бўйича касалликларнинг олдини олиш, уларга ташхис қўйиш ва касалликларни даволаш бўйича ўз илғор усулларини

ва технологияларини ишлаб чиқишга, ҳамда тиббий амалиётга жорий этишга қаратилган илмий тадқиқотлар олиб бориш;

е) ўз ихтисослиги бўйича касалликларга ташхис қўйиш ва уларни даволашнинг патентланган ўз усуллари ва технологияларини доимий равишда такомиллаштириб бориш, ҳамда уларнинг халқаро миқёсда эътироф этилишига эришиш;

ж) ўз ихтисослиги бўйича республика мақсадли дастурларини ишлаб чиқишда ва амалга оширишда фаол иштирок этиш;

з) ўз ихтисослиги бўйича хорижий етакчи тиббиёт муассасалари билан халқаро ҳамкорликни кенгайтириш ва мустақамлаш, тўпланган тажриба, ахборотлар, шунингдек, мутахассислар кенг алмашинувини таъминлаш;

и) Марказ ҳудудлардаги оториноларингология тизимидаги ташкилотларга, бирламчи даволаш ва бошқа ихтисослаштирилган тиббиёт ташкилотларига ташкилий услубий раҳбарлик қилиш, уларнинг амалиётига тиббий ёрдамнинг замонавий усуллари ва технологияларини жорий этиш, минтақаларда зарур профилактик ишлар ўтказишда кўмаклашиш, сайёр консультациялар, маҳорат дарсларини мунтазам равишда ўтказиб бориш.

10. Марказ ўзига юкланган вазифаларни бажариш учун қуйидаги функцияларни бажаради:

ўз ихтисослиги бўйича ҳозирги замон халқаро талаблари даражасида касалликларга ташхис қўйиш, уларни даволаш ва олдини олишнинг энг самарали, мураккаб ва юқори технологик усулларига бўлган республика аҳолисининг эҳтиёжини қондиради;

ўз ихтисослиги бўйича кенг тарқалган касалликларга ташхис қўйиш, уларни даволаш ва олдини олишнинг илғор самарали усуллари, ҳамда технологияларини ишлаб чиқади ва жорий этади;

ҳудудлардаги оториноларингология тизимидаги ташкилотларга, шунингдек, республика ҳудудларида ўз ихтисослиги бўйича маслаҳат-диагностика тиббий ёрдамни кўрсатувчи бошқа шу йўналишдаги муассасаларга (бўлинмаларга) ташкилий-услубий ва илмий амалий ёрдам кўрсатади;

ҳудудларга борган ҳолда юқори малакали ихтисослаштирилган тиббий ёрдам кўрсатади;

ўз ихтисослиги бўйича ўзининг юқори малакали мутахассислар мактабини шакллантиради ва ривожлантиради;

Марказ ихтисослиги бўйича тиббиёт соҳасидаги илмий тадқиқотларни ривожлантиришнинг устувор йўналишлари бўйича таклифларни кўриб чиқиш учун Ўзбекистон Республикаси Соғлиқни сақлаш вазирлигига киритади;

дори воситаларини, тиббиёт буюмларини, шунингдек, ўз ихтисослиги бўйича ташхис қўйиш ва даволаш усуллари клиник синовдан ўтказиш;

хориждаги тиббиёт ҳамжамиятига ўзининг илмий ва технологик ютуқларини тақдим этади;

Ўз ихтисослиги бўйича ўзининг илмий, ўқув-услубий ва ахборот-маълумотнома материалларини чоп этади;

тиббиёт кадрларини клиник ординатурада, базавий докторантурада, докторантурада, катта илмий ходим-изланувчилар институтида тайёрлайди, қайта тайёрлайди ва уларнинг малакасини оширади;

Марказнинг тиббиёт кадрларини тайёрлаш, қайта тайёрлаш ва уларнинг малакасини ошириш, чет мамлакатларнинг шу йўналишдаги тиббиёт муассасалари иштирокида қўшма илмий-амалий тадқиқотлар ўтказиш учун юқори малакали чет эллик мутахассисларни жалб қилади;

амалий кўникмаларни мустақкамлаган ҳолда назарий билимларни ўзлаштириш асосида тиббиёт таълим муассасаларида шу йўналишдаги мутахассисликлар бўйича таълим сифатини оширишга фаол кўмаклашади.

3-боб. Марказнинг ҳуқуқлари ва мажбуриятлари

11. Марказ ўзига юкланган вазифалар ва функцияларни бажариш учун қуйидаги ҳуқуқларга эга:

қонунчилик ҳужжатларида белгиланган доирада ўзига берилган давлат мулкидан фойдаланиш ва уни тасарруф этиш;

ривожлантиришга доир бизнес-режаларни, харажатлар сметаларини мустақил шакллантириш, уларнинг ҳажмларини ва шакллантириш манбаларини, шунингдек, харажатлар йўналишларини белгилаш;

қонунчилик ҳужжатларида белгиланган тартибда асосий воситаларни ижарага олиш ёки ижарага бериш, грантларни ва бошқа ёрдамларни жалб қилиш;

қонунчилик ҳужжатларида белгиланган тартибда тиббий ва бошқа хизматларни кўрсатишдан тушган даромадлар доирасида Марказ ходимларининг меҳнатга ҳақ тўлаш ва уларни моддий рағбатлантириш миқдорларини белгилаш;

мавжуд молиявий ресурслар ва ўз фаолиятдан топилган фойда доирасида асбоб-ускуналар, дори воситалари ва Марказ фаолиятини таъминлаш учун зарур бўлган бошқа моддий-техник воситалар харидини амалга ошириш;

ўз ихтисослиги бўйича илмий тадқиқотлар ўтказиш мақсадида Ўзбекистон Республикаси Давлат бюджетидан грантлар олиш учун танловларда иштирок этиш;

ўз фаолиятини амалга ошириш жараёнида яратилган интеллектуал мулк объектларига доир муаллифлик ҳуқуқларини олиш ва улардан фойдаланиш;

чет эллик юридик шахслар билан илмий ва илмий-техник ҳамкорлик қилиш, шунингдек, Ўзбекистон Республикасининг қонунчилик ҳужжатларига ва халқаро шартномаларига мувофиқ ташқи иқтисодий фаолиятни олиб бориш;

Ўзбекистон Республикаси Соғлиқни сақлаш вазирлиги билан келишувга кўра республика худудларида филиаллар ташкил этиш;

Марказ қонунчилик ҳужжатларига мувофиқ бошқа ҳуқуқларга ҳам эга бўлиши мумкин.

12. Марказ Ўзбекистон Республикаси Иқтисодиёт ва молия вазирлиги ҳамда Рақобатни ривожлантириш ва истеъмолчилар ҳуқуқларини ҳимоя қилиш қўмитаси

билан келишувга кўра Ўзбекистон Республикаси Соғлиқни сақлаш вазирлиги томонидан белгиланадиган тарифларни шакллантириш тартибига мувофиқ ташхис қўйиш ва даволаш сифати бўйича тасдиқланган стандартларга кўра кўрсатиладиган барча турдаги тиббий хизматлар нархларини мустақил равишда тасдиқлайди.

13. Марказ қуйидагиларга мажбур:

юқори малакали ихтисослаштирилган тиббий ёрдамга муҳтож бўлган касалларга ташхис қўйиш ва уларни даволаш сифати ҳамда стандартларнинг ҳозирги замон халқаро талаблари даражасида сақланишини ва ривожлантирилишини таъминлаш;

ўз ихтисослиги бўйича қуйидаги келтирилган шахсларга юқори малакали ихтисослаштирилган тиббий ёрдам кўрсатиш:

рўйхати қонунчилик ҳужжатлари асосида аниқланадиган имтиёзли тоифага кирувчи шахсларга бепул асосда;

Ўзбекистон Республикаси фуқароларига (бундан ушбу банднинг тўртинчи хатбошида кўрсатилган шахслар мустасно), шунингдек, чет эллик фуқароларга ва фуқаролиги бўлмаган шахсларга пулли асосда;

худудлардаги оториноларингология тизимидаги ташкилотларга, шунингдек, Қорақалпоғистон Республикасидаги, вилоятлардаги ва Тошкент шаҳридаги худудий бўлинмаларига маслаҳат, услубий ва техник ёрдам кўрсатиш;

ўз ихтисослиги бўйича касалликни олдини олиш, ташхис қўйиш ва даволашнинг янги технологияларини яратиш бўйича илмий тадқиқотларнинг юксак даражада ўтказилишини таъминлаш;

Марказ тиббиёт ходимларининг касбий даражасини, шу жумладан мутахассисларнинг хорижий етакчи тиббиёт таълим муассасаларида ва клиникаларида касалликларга ўз ихтисослиги бўйича ташхис қўйиш ва уларни даволашнинг замонавий усуллари бўйича стажировкаларини ташкил этиш ҳисобига доимий равишда ошириб бориш ва такомиллаштириш;

Марказ ходимларига қонунчилик ҳужжатларида назарда тутилган меҳнатни ташкил этиш шароитларини яратиш ва меҳнатга ҳақ тўлаш, хавфсизлик техникасини тақдим этиш, уларни ижтимоий жиҳатдан таъминлаш ва мақсадли ижтимоий ҳимоя қилиш;

Марказнинг моддий-техника базасини ўз маблағлари ва жалб этиладиган маблағлар ҳисобидан ривожлантириш, ҳамда замонавий тиббиёт техникаси ва технологиялари билан мустаҳкамлаш;

мол-мулкдан аниқ мақсадда фойдаланиш, унинг бутунлигини таъминлаш;

қонунчилик ҳужжатларига мувофиқ бухгалтерия ва статистика ҳисобини ҳамда ҳисоботини юритиш.

Марказда қонунчилик ҳужжатларига мувофиқ бошқа мажбуриятлар ҳам бўлиши мумкин.

4-боб. Марказнинг давлат органлари ва бошқа ташкилотлар билан ўзаро ҳамкорлиги

14. Марказ ўз вазифа ва функцияларини маҳаллий давлат ҳокимияти органлари ва бошқа ташкилотлар билан ҳамкорликда амалга оширади.

15. Марказ ўз ваколатлари доирасида давлат бошқаруви органлари, маҳаллий давлат ҳокимияти органлари ва бошқа ташкилотлар ҳамда уларнинг ҳудудий бўлинмалари билан оториноларингология соҳаси бўйича ҳамкорликда фаолият юритади.

5-боб. Марказ фаолиятининг самарадорлиги ва натижадорлигини баҳолаш мезонлари ҳамда индикаторларини белгилаш тартиби

16. Марказ фаолияти самарадорлиги мунтазам равишда баҳоланишдан ўтказилади.

17. Марказ фаолияти самарадорлиги ва натижадорлигини баҳолаш Соғлиқни сақлаш вазирлиги томонидан тасдиқланадиган Марказ фаолиятини баҳолаш мезонларига ҳамда унинг фаолияти самарадорлиги ва натижадорлигини аниқловчи индикаторларга асосланади.

18. Марказ фаолияти самарадорлиги ва натижадорлигини баҳолаш якунлари бўйича:

Марказ раҳбар ва ходимларига нисбатан рағбатлантириш (тақдирлаш) ёки интизомий жавобгарлик чоралари белгиланади;

Марказ фаолиятида аниқланган камчиликларни бартараф этиш ва унинг фаолиятини янада такомиллаштириш чоралари кўрилади.

6-боб. Марказнинг мол-мулки

19. Асосий фондлар, шунингдек бошқа моддий бойликлар ва молиявий ресурслар Марказнинг мол-мулкини ташкил этади.

20. Марказ доимий фойдаланиш ҳуқуқлари асосида ер участкасига эгалик қилади, қонунчилик ҳужжатларида белгиланган тартибда ўз фаолиятининг мақсадларига, мулкдорнинг топшириқларига ва мол-мулкнинг мақсадига мувофиқ ўзига бириктирилган мол-мулкка эгалик қилади, ундан фойдаланади ва уни тасарруф этади, бунда бюджет маблағлари ва бюджетдан ташқари маблағлардан самарали фойдаланишни таъминлайди.

21. Марказ қонунчилик ҳужжатларида белгиланган тартибда вақтинча фойдаланилмаётган биноларни шартнома асосида ижарага бериш, тушган маблағларни Марказни моддий-техник ривожлантириш учун ишлатиш, шунингдек асбоб-ускуналар ва мол-мулкни қонунчилик ҳужжатларида назарда тутилган тартибда балансдан чиқариш ҳуқуқига эга.

7-боб. Марказ тузилмаси ва Марказни бошқариш

22. Марказ кенгаши Марказнинг юқори бошқарув органи ҳисобланади.

Марказ кенгаши 7 кишидан иборат бўлиб, Марказ директоридан, Марказнинг етакчи тиббиёт ва илмий ходимларидан ташкил топади. Марказ кенгаши фаолиятида

Ўзбекистон Республикаси Соғлиқни сақлаш вазирлигининг ваколатли вакиллари иштирок этадилар.

Марказ кенгаши тўғрисидаги Низом ва унинг шахсий таркиби Марказ меҳнат жамоаси умумий йиғилишининг қарори билан тасдиқланади.

Марказ директори айти бир вақтда Марказ кенгаши раиси ҳисобланади.

23. Марказ кенгашининг асосий вазифалари қуйидагилардан иборат:

Марказнинг молиявий-хўжалик ва тиббий фаолиятини бошқариш, шунингдек, Марказ фаолиятининг самардорлигини оширишга қаратилган тавсияларни ишлаб чиқиш;

ривожланиш стратегиясини ишлаб чиқиш, Марказ инвестиция ва илмий-техник сиёсатнинг асосий йўналишларини белгилаш;

йиллик бизнес-режаларни ва молиявий ҳисоботларни тасдиқлаш;

аҳолига пулли асосда кўрсатиладиган тиббий ёрдам турлари нархларини белгиланган тартибда тасдиқлаш;

Марказдаги, шунингдек, унинг филиаллари ва ваколатхоналаридаги муносабатларни тартибга солувчи ҳужжатларни тасдиқлаш.

24. Марказ тузилмаси Марказ консультатив поликлиникасининг белгиланган бемор ўринлари фонди ва контингентларни қабул қилиш қуввати доирасида Марказ кенгаши томонидан қонунчилик ҳужжатларига мувофиқ белгиланади ва Ўзбекистон Республикаси Соғлиқни сақлаш вазирлиги томонидан тасдиқланади.

25. Марказнинг жорий фаолиятига раҳбарликни Ўзбекистон Республикаси соғлиқни сақлаш вазири томонидан Ўзбекистон Республикаси Вазирлар Маҳкамаси билан келишилган ҳолда тайинладиган ва лавозимидан озод этиладиган директор амалга оширади.

26. Марказ директори:

Марказ номидан ўз фаолиятини олиб боради, Марказнинг молия-хўжалик фаолиятига раҳбарлик қилади, Марказ номидан шартномалар тузади, Марказ фаолияти билан боғлиқ бўлган бошқа масалаларни ҳал қилади;

Марказ ва унинг филиаллари ходимлари ишларини ўз ваколатлари доирасида ташкил этади ва бошқаради, Марказ ва унинг филиаллари ходимлари томонидан бажарилиши шарт бўлган буйруқлар чиқаради, Марказ ходимларини қонунчилик ҳужжатларига мувофиқ ишга қабул қилади ва ишдан бўшатади;

Ўзбекистон Республикаси соғлиқни сақлаш вазирига филиал директори (раҳбари) номзодини лавозимга тайинлаш ва лавозимидан озод этиш учун тақдим этади;

Марказ фаолияти учун жавоб беради.

27. Марказ директори ўринбосарлари Ўзбекистон Республикаси соғлиқни сақлаш вазири томонидан Марказ директорининг тақдимномасига биноан лавозимга тайинланади ва лавозимидан озод этилади.

28. Марказда унинг етук илмий ходимларидан ва мутахассисларидан иборат Илмий кенгаш ташкил этилади.

29. Марказнинг Илмий кенгаши тўғрисидаги Низом ва унинг шахсий таркиби Марказ директори томонидан тасдиқланади.

30. Ўзбекистон Республикаси Соғлиқни сақлаш вазирлиги Марказнинг фаолиятини назорат қилади.

8-боб. Марказ фаолиятини молиялаштириш

31. Марказ фаолияти:

Ўзбекистон Республикасининг Давлат бюджети маблағлари;

Марказнинг ўз даромадлари;

грантлар ва хайрия ёрдами;

қонунчилик ҳужжатларида тақиқланмаган бошқа манбалар ҳисобидан молиялаштирилади.

32. Марказнинг ўз даромадлари қуйидагилар ҳисобига шакллантирилади:

аҳолига пулли тиббий хизматлар кўрсатиш;

Марказнинг илмий ва ўқув базасида бошқа тиббиёт муассасаларининг шу йўналишдаги мутахассисларини тайёрлаш;

илмий-тадқиқот ишларини олиб бориш;

қонунчилик ҳужжатларида тақиқланмаган бошқа манбалар.

33. Ўзбекистон Республикаси Давлат бюджети маблағлари қуйидаги мақсадларга ажратилади:

қонунчилик ҳужжатларида белгиланган тартибда аниқланадиган имтиёзли тоифага кирувчи беморларга бепул асосда юқори малакали ихтисослаштирилган тиббий ёрдам кўрсатиш бўйича Марказ томонидан кўрсатиладиган хизматларга ҳақ тўлаш;

аҳолига имтиёзли тарифлар бўйича айрим турдаги юқори технологик (қиммат турадиган) тиббий хизматлар кўрсатиш билан боғлиқ хизматларга ҳақ тўлаш. Уларнинг рўйхати ва тўланадиган ҳақ фоизи Ўзбекистон Республикаси Соғлиқни сақлаш вазирлиги томонидан Ўзбекистон Республикаси Иқтисодиёт ва молия вазирлиги билан келишилган ҳолда аниқланади. Аҳолига имтиёзли тарифлар бўйича кўрсатиладиган айрим турдаги технологик (қиммат турадиган) тиббий хизматлар рўйхати ва тўланадиган ҳақ фоизи заруратга қараб, бироқ уч йилда камида бир марта қайта кўриб чиқилади;

Марказни соғлиқни сақлашни ривожлантиришга доир давлат дастурлари ва Ўзбекистон Республикасининг ҳар йиллик инвестиция дастурлари доирасида замонавий тиббиёт асбоб-ускуналари ва техникалари билан жиҳозлаш;

Марказни мукамал таъмирлаш, қайта қуриш;

илмий-тадқиқот фаолияти учун грантлар шаклида.

34. Марказга аҳолига юқори малакали ихтисослаштирилган тиббий хизматлар кўрсатиш билан боғлиқ хизматларга ҳақ тўлаш учун ажратиладиган Ўзбекистон Республикаси Давлат бюджети маблағларининг аниқ миқдори Ўзбекистон

Республикаси Соғлиқни сақлаш вазирлиги ва Марказ томонидан “Соғлиқни сақлаш” соҳасига ҳар йили бюджетдан ажратиладиган маблағлар доирасида тегишли юқори малакали ихтисослаштирилган тиббий ёрдам олишга бўлган эҳтиёжга қараб аниқланади.

35. Марказга бюджет маблағлари Ўзбекистон Республикаси Соғлиқни сақлаш вазирлиги томонидан ҳар ойда алоҳида қаторда қисмларга бўлинмаган ҳолда ажратилади.

36. Марказ ходимлари сони, уларнинг иш ҳақи ва моддий рағбатлантириш миқдори бажарилаётган ишларнинг мураккаблиги, сифати ва ҳажмига қараб Марказ директори томонидан мустақил тасдиқланади.

37. Марказ тиббий хизматлар кўрсатишдан ва бошқа хизматлардан тушган даромадлар доирасида мустақил равишда:

Марказ даромадлари ва харажатлари сметасини ишлаб чиқади ҳамда тасдиқлайди;

Марказ ходимларининг меҳнатига ҳақ тўлаш ва уларни моддий рағбатлантириш тўғрисидаги Низомни ишлаб чиқади ва тасдиқлайди;

қонунчилик ҳужжатларида белгиланган тартибда штат жадвалини тасдиқлайди ва лавозим маошининг базавий миқдоридан келиб чиқиб, лавозим маошларини, шунингдек, устама ва кўшимча ҳақларни белгилайди.

38. Марказ хўжалик фаолиятдан тушган даромадларни мустақил равишда тасарруф этади. Марказнинг ўз молиявий-хўжалик фаолияти натижасида олган фойдаси Ўзбекистон Республикаси Давлат бюджетига тегишли солиқлар ва бошқа мажбурий тўловлар тўлангандан кейин Марказ ихтиёрида қолади ҳамда белгиланган тартибда:

Марказнинг моддий-техник базасини янгилаш, модернизациялаш ва кенгайтириш, замонавий тиббиёт техникасини, инвентарь ва асбоб-ускуналарни харид қилиш;

Марказ ходимларини моддий рағбатлантириш;

айланма маблағларни тўлдириш;

Марказ мутахассисларини тайёрлаш, қайта тайёрлаш ва уларнинг малакасини ошириш;

маҳсулот ва хизматларни реклама қилиш;

Марказ фаолиятини таъминлаш билан боғлиқ бошқа мақсадлар учун фойдаланилади.

Бунда Марказ ушбу бандда кўрсатилган харажатларнинг устуворлик тартибини, йўналишларини ва нисбатини ўзи белгилайди.

9-боб. Ҳисобга олиш ва ҳисобот

34. Марказ қонунчилик ҳужжатларида белгиланган тартибда бухгалтерия ҳисоби ва ҳисоботини юритади, уларни Ўзбекистон Республикаси Соғлиқни сақлаш вазирлигига ва Ўзбекистон Республикаси Президенти ҳузуридаги Статистика

агентлигига тақдим этади, ҳужжатларнинг бутлиги ва келишилган рўйхатга мувофиқ давлатга сақлаш учун топшириш учун жавоб беради.

35. Марказнинг молия-хўжалик фаолиятини назорат қилиш ва текшириш иқтисодиёт ва молия органлари, бошқа давлат органлари томонидан уларнинг ўз ваколатлари доирасида, шунингдек, қонунчилик ҳужжатларида назарда тутилган тартибда аудитор ташкилотлари томонидан улар билан тузилган шартномалар асосида амалга оширилади.

10-боб. Яқунловчи қоида

36. Марказни қайта ташкил этиш ва тугатиш қонунчилик ҳужжатларида белгиланган тартибда амалга оширилади.